

*Awiyaag
Genawenimindwaa
Ji-naagajiwindwaa
Onaakonigewin*

Wiijwindwaa Anokii'aaganag

ANDOOSHKIGENG

Omaa Manitoba maawaj minose wiiji'iwewin miziwekamig. Miziwe enokaadamowaad mino-ayaawin waawiiji'idiwag amii wenji-minosenig wendanokiitamowaad.

DIBAAJIMOYAN AYIZHISEG

Wegonen idash iwe Protection for Person in Care Act onaakonigewin?

Iwe onaakonigewin onaagaji'aagonaawaa' awiyag gaa-ganawenimindwaa daabishkoo ogitaadiziig, odaakoziig gemaa bebakaan awiyag. Zhigwa miinawaa, anokii'aaganag onaagaji'igonaawaa' gaye giishin anishaa anaamimindwaa gegoo.

Awenen genawaabandag dibaajimong gagwaadagi'iwewin?

Endanokiing The Protection for Persons in Care Office gaa-ijigaadeg oganawaabandaanaawaan dibaajimong gagwaadagi'iwewin miziwe omaa Manitoba. Giishin waabamad awiya gagwaadagiwind, akawe da-booni'aa jibwaa dibaajimoyan. Anokii'aaganag zhigwa onandooshkigeg wiidookaadiwag gakina awiya ji-mino-ayaapan.

Gakina na gegoo debaajimong andooshkigaade?

Gaawiin. Giishin miinindwaa dibaajimowin, onandooshkige Abuse Prevention Consultant enind oganawaabandaan dagasanaa ji-andooshkigaadegiban.

Wegonen debaajimong da-gikenji-gaade aaniin ge-izhi-andooshkigaadeg. Aanind gegoon bakaan izhichigaadewan, maagizhaa neyaab ganawenimiwewin gemaa gaa-niigaanishkamowaad mino-ayaawin da-miinaawag ji-dazhiikamowaad.

Awenen ji-dibaajimopan?

Onaakonigewining izhisin, zhemaag ji-dibaajimong awiya gagwaadagiwind. Giishin idash awiya gikendang awiyag gagwaadagi'imind gemaa wii-gagwaadagi'imind, zhemaag ji-dibaajimopan. Maagizhaa gaye gidaa-dibaajimotawaa gidoozimaa enokiian, bigo dash ji-dibaajimotawadwaa gaa-naagaji'iwewaad.

Giimooj ina nindaa-dibaajim?

Gaawiin, onjida ji-wiindamaageyan giwiinzowin zhigwa aandi ge-izhiganoonigooyamban ji-gikendamoonigooyan aaniin ayizhiseg gemaa awashime gegoon noonde-gagwejiimigooyan.

Giishin izhi giigidoyan dibaajimoyan gagwaadagi'iwewin, gaawiin mookinigaadesinooon giwiinzowin.

EZHI-ANDOOSHKIGENG

Aaniin ezhiseg andooshkigaadeg gagwaadagi'iwewin?

Awiya enanokiid nitam izhi giigido endazhi-gagwaadagi'iweng, wiin-damaage owiinzowin zhigwa aanapii ge-dagoshing.

Apii dagoshing onandooshkige imaa, waabanda'iwe omazina'igan ji-andooshkiged. Maagizhaa onoonde-gaganoonaa' awiya' gegoon wii-gagagwedwed. Odaa-gaganoonaa' anokii'aagana' endananokiinid gemaa bakaan ningoji, wiin daa-ikido awe gaawii-gaganoonind.

Maagizhaa gaye odaakozi gemaa genawenimind gaa-andooshkigaadenig gegwaadagiwind gegoo noonde-iki-dodog.

Awenen Endooshkiged?

Bebakaaniziwaad ezhigaabawiwaad mazina'ige'aawag ji-andooshkigewaad. Ozagakibii'aanaawaa' gaa-wiindamawindwaa, mii ezhi-gikendaagwak daga ji-gii-gagwaadagi'iweng. Giishpin endooshkiged ganoonig, nawach daa-minose wiidookaageyan ji-giizhanokaadeg owe dibaajimowin.

Gaawiin ina memwech nindaa-gaganoonaasii' awiya'?

Eya,' onjida dash onandooshkige oga-andooshkaan gagwaadagi'iwewin gaagii-wiindamawind giishin abooshke gaganoonaasiwad.

Ji-gikendamamban idash giishin gaganoonad onandooshkige, giga-gashkitoon ji-wiindamawad awegonen giin gekendaman. Eniwek daa-gikenjigaade aaniin gaa-izhiseg.

Awiya gidaa-wiijiwaa ji-wiidabimig daabishkoo gidoogimaa, ginaada-maagewininiim gemaa bakaan awiya, gemaa gaye gidaa-nishike-gaganoonaa. Boojigo.

Aaniin ezhiseg apii ani-maajaad onandooshkige?

Onandooshkige oga-zagakibii'aan gaa-wiindamawind ji-ganawaabanji-gaadenig. Giishin mikigaadeg awiya gagwaadagiwind genawenimind, da-ozhibii'amawaawag genawenimi-wewaad. Da-wiindamawaawag aaniin ji-izhichigewaad.

Giishpin idash mikigaadesinog awiya gii-gagwaadagi'aasiwind, da-ozhibii'igaade mazina'iganing.

Jibwaa ozhibii'amawindwaa genawenimi-wewaad, mazina'igan da-ozhibii'amawaawag wiindamawindwaa aaniin gaa-inaabanjigaadenig dibaajimowin. Genawenimi-wewaad, zhigwa onakonigewin gaa-niigaanishkamo-waad da-maamiinaawag ozhibii'igaadenig dibaajimowin apii wiidabindiwaad.

Daa-dibaakozhiwem ina onakonigewining?

Gaawiin. Da-wiindamaagem idash wiin aaniin ji-izhi-naagajiwindwaa genawenimindwaa. Wiinawaa genawenimi-wewaad ji-gwayakochigewaad. Maagizhaa idash gaa-andooshkigewaad oga-wiindamawaawaan aaniin ji-izhichigenid gaa-gagwaadagi'imind.

JI-WIJIWINDWAA ANOKII'AAGANAG

Aaniin ge-izhi-wiiji'aawindwaaban anokii'aaganag?

Ayaamagad ge-izhi-wiiji'aawindwaaban anokii'aaganag megwaa andooshkigeng. Maagizhaa omaa gidaa-onji-wiiji'igoo.

- Gidoogimaamag ge-wiiji'ikwaa gemaa ningoji bakaan daabishkoo gagiikwemindiwin.
- Employee Assistance Programs (EAP) – (204) 786-8880, toll-free 1-800-590-5553, TTY (204) 775-0586. Available 24 hours/day, seven days/week
- Awiya ge-giigidootamaag
- Awenenag wiidanokiimadwaa
- College of Physicians and Surgeons (204) 774-4344
- College of Registered Nurses of Manitoba (204) 774-3477
- College of Licensed Practical Nurses (204) 663-1212
- College of Registered Psychiatric Nurses of Manitoba (204) 888-4841
- Canadian Nurses Protective Society (CNPS) 1-800-267-3390

- Gaa-wiidanokiimadwaa
- Gekinoo'amaagooyan, giishin gikina'amaagooyan
- Ge-gagiikimikwaa

GEYAABI WIINDAMAAGEWIN?

Giishin geyaabi noonde-gikendaman imaa onakonigewining gemaa andooshkigeng, omaa izhi giigidon:

The Protection for Persons
in Care Office

300 Carlton Street
Winnipeg, Manitoba R3B 3M9

Phone (204) 788-6366 in Winnipeg

Toll-free 1-866-440-6366 agwaji-
Winnipeg

Fax: (204) 775-8055

TTY: (204) 786-7132

Toll-free: 1-800-855-0511

E-mail: protection@gov.mb.ca

Web site:
www.gov.mb.ca/health/protection

*Manitoba Health onanaakomaawaa'
ini Winnipeg Regional
Health Authority gaa-inimind
ji-gashkitoowaad ji-ozhitoowaad
owe mazina'igan.*